

乙:對啦，講正經也，恁母也的手，敢有像「阿母的手」所唱的彼嬌、彼幼秀咧？

甲:無母著，在我的心肝內，伊母但足嬌、足幼秀，閣足偉大，伊無所求的為阮付出足濟、足濟，人講：有父母疼惜的囡仔上好命，我感覺家已足幸福 ē！

乙:俗語講「豬生豬疼，狗生狗疼」，父母疼子是天性，毋是有一句俗語講「父母疼子是長流水」序大人對子的愛，毋但深遠閣久長。

甲:聽你按爾講，你對父母親情不止仔有研究喔!茲碼 (tsit-má) 拄好是五月，你就加講一寡來予逐家鼻芳咧!啥款？

乙:我知，我知!你是挑工欲共我考試 hoonnh，人我，人才普通，學問相當，算盤會摸，台語嘛淡薄仔會通，無～咱著一人一句，來較一下高低咧!

甲:好啊!拼輸贏，較高低，我才無在驚咧，來!我代先講「倖 (寵) 豬夯灶，倖 (寵) 子不孝」飼囡袂使過頭寵倖，若無，是顛倒害伊。

乙:真好!我知影有一句「健奴無禮，驕兒不孝」，意思嘛差不多相款。

甲:有人是「做不盡的子孫屋，買不盡的子孫田」。

乙:唉!真勞苦，猶是愛做較巧的父母，譬如講「父母若無夠雄，做子的著昧堅強」。

甲:稍等咧!你嘛解釋一下仔，愛按怎雄，才會按怎強？

乙:你敢毋曾 (bat) 聽過鳥母教鳥仔子飛的故事?一旦鳥仔子翅股硬，鳥母就會訓練個學飛，通好家已去討食，彼的時陣鳥母會心肝掠坦橫，雄雄共鳥仔子踢出去，個子無勇敢學飛，恐驚會摔死，等會曉飛去四界討食，才袂餓死，雖然誠雄，毋過，伊的出發點嘛是因為“愛”，敢講人的智慧會較輸鳥仔類。

甲:mh~~有道理呢!真正是「烏斫仔貯豆油」看袂出，你腹肚內誠有膏 ôo!